

**Bosna i Hercegovina**  
**FEDERACIJA BOSNE I HERCEGOVINE**  
**FEDERALNO MINISTARSTVO PRAVDE**  
**S A R A J E V O**

**- N A C R T -**  
**bosanski jezik**

**ZAKON O IZMJENAMA I DOPUNAMA ZAKONA O REGISTRACIJI POSLOVNIH**  
**SUBJEKATA U FEDERACIJI BOSNE I HERCEGOVINE**

**Sarajevo, septembar 2013. godine**

## PRIJEDLOG

### Za donošenje Zakona o izmjenama i dopunama Zakona o registraciji poslovnih subjekata u Federaciji Bosne i Hercegovine

Postupajući u smislu odredaba člana 26. Poslovnika o radu Vlade Federacije Bosne i Hercegovine – prečišćen tekst ( „Službene novine Federacije BiH“, br. 6/10, 37/10 i 62/10) predlažemo donošenje Zakona o izmjenama i dopunama Zakona o registraciji poslovnih subjekata u Federaciji Bosne i Hercegovine po hitnom postupku, obzirom da su u konkretnom slučaju ispunjeni uvjeti iz člana 191. stav 2. Poslovnika Predstavničkog doma Parlamenta Federacije Bosne i Hercegovine ( „Službene novine Federacije BiH“, br. 69/07 i 2/08) i člana 186. stav 2. Poslovnika o radu Doma naroda Parlamenta Federacije Bosne i Hercegovine ( „Službene novine Federacije BiH“ br. 27/03 i 21/09).

Naime, predloženim zakonskim rješenjem predviđa se pojednostavljenje procedure upisa privrednih subjekata u sudski registar, čime se otklanjaju postojeće administrativne prepreke koje su u znatnoj mjeri otežavale dolazak novih privrednih investicija u Federaciju BiH. Uzimajući u obzir da je u završnoj fazi zakonodavne procedure Prijedlog zakona o izmjenama i dopunama Zakona o privrednim društvima, kojom se tretira pitanje podružnica stranih privrednih društava, nužno je usvojiti predložene izmjene i dopune iz razloga što je jedna od funkcija Zakona o registraciji poslovnih subjekata odgovarajuća provedba materijalnih odredbi Zakona o privrednim društvima. Neusvajanjem ovih izmjena i dopuna bila bi nemoguća registracija podružnica stranih privrednih društava kao temeljnog uslova za početak njihovog rada.

## ZAKON O IZMJENAMA I DOPUNAMA ZAKONA O REGISTRACIJI POSLOVNIH SUBJEKATA U FEDERACIJI BOSNE I HERCEGOVINE

### Član 1.

U Zakonu o registraciji poslovnih subjekata u Federaciji Bosne i Hercegovine („Službene novine Federacije BiH“, br. 27/05, 68/05 i 43/09), član 15. mijenja se i glasi:

„Registracija podružnice subjekta upisa

(1) Podaci koji se obavezno unose u registar u slučaju registracije podružnice subjekta upisa su:

- 1) firma i sjedište podružnice subjekta upisa;
- 2) djelatnost podružnice subjekta upisa;
- 3) naziv, broj i datum notarski obrađenog akta o osnivanju podružnice subjekta upisa;
- 4) ime i prezime, jedinstveni matični broj i broj lične karte, lica ovlaštenog za zastupanje podružnice subjekta upisa.

(2) Podružnica subjekta upisa upisuje se u glavnu knjigu registra osnivača dijela subjekta upisa.“.

### Član 2.

Iza člana 15. dodaje se novi član 15a. koji glasi:

#### „Član 15a.

Registracija podružnice stranog društva

(1) Podaci koji se upisuju u registar u slučaju registracije podružnice stranog društva su:

- 1) firma, sjedište i oblik osnivača, te firma i sjedište podružnice stranog društva;
- 2) MBS i poreski identifikacioni broj;
- 3) naziv registra u kojem je upisan osnivač, uz podatak u kojoj se državi vodi, datum upisa i broj pod kojim se vodi, a ako je osnovan u zemlji u kojoj se ne upisuje u takav registar, naziv javno ovjerene isprave o osnivanju po propisima zemlje u kojoj osnivač ima sjedište;
- 4) djelatnost osnivača i djelatnost podružnice subjekta upisa;
- 5) naziv, broj i datum akta o osnivanju podružnice osnivača;
- 6) ime i prezime lica ovlaštenog za zastupanje podružnice, i obim njegove ovlasti;
- 7) visina osnovnog kapitala i iznos uplaćenih uloga, ime i prezime lica koje lično odgovaraju za obaveze društva, i njihovo prebivalište.

(2) Podružnica stranog društva upisuje se u registar suda na čijem području je sjedište podružnice.

(3) Rješenje o registraciji podružnice stranog društva, registarski sud dostavlja Poreznoj upravi Federacije Bosne i Hercegovine, Ministarstvu vanjske trgovine i ekonomskih odnosa Bosne i Hercegovine i Ministarstvu bezbjednosti Bosne i Hercegovine-Odsjek za strance, ukoliko je zastupnik strani državljanin.“.

### Član 3.

U članu 17. stav 1. tačka 3), članu 18. stav 1. tačka 3), članu 19. stav 1. tačka 3) i članu 20. tačka 1), riječi: „notarski obrađenog“ brišu se.

### Član 4.

Član 22. mijenja se i glasi:

„Član 22.

Registarske isprave

(1) Za potrebe utvrđivanja i provjere općih i posebnih podataka koji se prilikom osnivanja poslovnog subjekta ili izmjena podataka od značaja za pravni promet obavezno unose u registar, u ovisnosti od predmeta upisa, registarski sud zahtijevat će podnošenje sljedećih isprava:

- 1) ovjereni potpis lica ovlaštenog za zastupanje na obrascu prijave za registraciju predviđenom za sud u štampanom obliku;
- 2) notarski obrađeni akt o osnivanju ili akt o izmjenama općih podataka od značaja za pravni promet već osnovanog, odnosno registriranog subjekta upisa kojim se utvrđuje osnivanje, odnosno izmjena bitnih podataka;
- 3) notarski utvrđen statut poslovnoga subjekta;
- 4) odluku o imenovanju lica ovlaštenog za zastupanje u unutarnjem vanjskotrgovinskom prometu, ako nije imenovana aktom o osnivanju;
- 5) potvrdu banke o izvršenoj uplati na privremeni račun deponovanih novčanih uloga kojom se utvrđuje visina uplaćenog kapitala u novcu;
- 6) dokaz o sredstvima osiguranja za neuplaćeni iznos novčanog dijela osnivačkog uloga kod jednočlanog društva kapitala;
- 7) izvod iz odgovarajućeg javnog registra kojim se dokazuje vlasništvo nad ulogom u stvarima i pravima, odnosno prijava za odgovarajući javni registar, i nalaz ovlaštenoga sudskog vještaka kojim se utvrđuje vrijednost uloga u stvarima i pravima;
- 8) odgovarajuće odobrenje Komisije za vrijednosne papire Federacije Bosne i Hercegovine (u daljnjem tekstu: Komisija za vrijednosne papire) i Registra vrijednosnih papira Federacije Bosne i Hercegovine (u daljnjem tekstu: Registar vrijednosnih papira), ukoliko je to propisano posebnim zakonom;

- 9) dokaz o sredstvima osiguranja za neuneseni dio nenovčanoga uloga kod jednočlanog društva kapitala;
- 10) odobrenje nadležnogorgana u skladu sa članom 46. ovoga Zakona.

(2) Odredbe stava 1. tačke 1) ovoga člana primjenjuju se kod upisa osnivanja svih oblika privrednih društava, kao i kod upisa promjene podataka koji se tim ispravama dokazuju, osim ako je njihova primjena izričito isključena ovim Zakonom.“.

#### Član 5.

U članu 23. stav 1. mijenja se i glasi:

„(1) Uz prijavu za upis osnivanja dioničkog društva pored ostalih, podnose se i sljedeće isprave:

- 1) isprave propisane članom 22. stav 1. tačka. 1) ovog Zakona;
- 2) notarski obrađen akt o osnivanju;
- 3) notarski utvrđen statut;
- 4) odobrenje nadležnihorgana iz člana 22. stav 1. tačka 8), ako je posebnim propisom predviđeno;
- 5) isprave propisane članom 22. stav 1. tačka 9) ovog Zakona;
- 6) potvrda banke o uplati osnivačkog kapitala u novcu, odnosno dokaz o novčanoj vrijednosti stvari i prava unesenih u društvo;
- 7) odluka o imenovanju lica ovlaštenog za zastupanje, ako nije imenovano aktom o osnivanju;
- 8) ovjeren potpis lica ovlaštenog za zastupanje.“.

#### Član 6.

U članu 24. stav 1. mijenja se i glasi:

„(1) Uz prijavu za upis u registar osnivanja banke ili druge finansijske organizacije pored ostalih, podnose se i slijedeće isprave:

- 1) isprave propisanečlanom 22. stav 1. tačka 1) ovog Zakona;
- 2) notarski obrađen akt o osnivanju banke;
- 3) notarski utvrđen statut banke;
- 4) rješenje Agencije za bankarstvo Federacije Bosne i Hercegovine (u daljnjem tekstu: Agencija za bankarstvo) o izdavanju dozvole za rad kao i saglasnost na akt o osnivanju i statut, odnosno isprave predviđene drugim zakonima Federacije;
- 5) dokaz da su uplaćena novčana sredstva na privremeni račun kod banke;
- 6) akt o imenovanju direktora ili vršioca dužnosti direktora;
- 7) ovjeren potpis lica ovlaštenog za zastupanje;
- 8) dokaz da su osnivači banke sredstva u nenovčanom obliku stavila na raspolaganje banci.“.

#### Član 7.

U članu 25. stav 1. mijenja se i glasi:

„(1) Uz prijavu za upis u sudski registar osnivanja dioničkog društva za osiguranje prilažu se:

- 1) isprave propisane članom 22. stav 1. tačka. 1) ovog Zakona;
- 2) notarski obrađen akt o osnivanju;
- 3) notarski utvrđen statut društva;
- 4) dozvola nadležnog organa za rad društva, odnosno druge isprave propisane drugim zakonom Federacije;
- 5) akt o imenovanju direktora ili vršioca dužnosti direktora;
- 6) ovjeren potpis lica ovlaštenog za zastupanje;
- 7) dokaz o deponovanim novčanim sredstvima na privremeni račun;
- 8) dokaz o ulozima u stvarima i pravima.“.

#### Član 8.

U članu 26. stav 1. mijenja se i glasi:

„(1) Uz prijavu za upis u registar osnivanja društva sa ograničenom odgovornošću prilažu se sljedeće isprave:

- 1) isprave propisane članom 22. stav 1. tačka. 1) ovog Zakona;
- 2) notarski obrađen akt o osnivanju;
- 3) potvrda banke o izvršenoj uplati kapitala u novcu odnosno dokaz o novčanoj vrijednosti stvari i prava unesenih u društvo;
- 4) odluka o imenovanju lica ovlaštenog za zastupanje ukoliko nije imenovano aktom o osnivanju;
- 5) ovjeren potpis lica ovlaštenog za zastupanje.“.

#### Član 9.

Član 28. mijenja se i glasi:

„Isprave potrebne za upis u sudski registar osnivanja javnog preduzeća i privatizacije preduzeća

(1) Na upis u registar osnivanja javnog preduzeća shodno se primjenjuju odredbe zakona kojim se uređuje upis dioničkog društva i društva sa ograničenom odgovornošću, u zavisnosti od oblika organiziranja javnog preduzeća.

(2) Kod prijave upisa u registar izvršene privatizacije subjekt upisa je, u zakonom utvrđenom roku, dužan prijaviti za upis u registar promjenu vlasništva uz koju, zavisno od oblika organiziranja, prilaže: pisano obavještenje o izvršenoj privatizaciji državnog kapitala u preduzeću od nadležne agencije za privatizaciju, odluku o promjeni oblika preduzeća kao sastavnog dijela programa privatizacije, ugovor o pribavljanju dodatnog kapitala (dokapitalizaciji) i druge isprave kojima se dokazuju ostali opći podaci.“.

#### Član 10.

U članu 29. stav 1. tačka 1), riječi: „tač. 1), 2) i 3)“ mijenjaju se i glase: „tačka 1)“.

U tački 3), riječ „obrađen“ zamjenjuje se rječju „utvrđen“.

U tački 5) riječi: „notarski obrađen“ brišu se.

#### Član 11.

U članu 30. riječi: “notarski obrađena“ brišu se.

#### Član 12.

U članu 31. stav 1. mijenja se i glasi:

„(1) Uz prijavu za upis u registar osnivanja zadruge prilažu se:

- 1) notarski obrađen akt o osnivanju;
- 2) zadružna pravila;
- 3) dokaz o izvršenoj uplati ili unošenju udjela, odnosno sredstava osnivača u skladu sa osnivačkim aktom;
- 4) odluka o imenovanju direktora;
- 5) ovjeren potpis lica ovlaštenog za zastupanje.“.

#### Član 13.

Iza člana 32. dodaje se novi član 32a. koji glasi:

#### „Član 32a.

Isprave potrebne za upis u sudski registar osnivanja podružnice stranog društva

Uz prijavu za upis u registar osnivanja podružnice stranog pravnog lica podnose se sljedeće isprave, u originalu i ovjerenom prevodu na jedan od službenih jezika u Bosni i Hercegovini:

- 1) izvod iz registra u kojemu je upisan osnivač na osnovu kojeg se može utvrditi njegov pravni oblik i vrijeme kada je upisan u taj registar ili, ako je osnovan u zemlji gdje se ne upisuje u takav registar, valjane isprave o osnivanju javno ovjerene po propisima zemlje u kojoj osnivač ima registrovano sjedište, na osnovu kojih se može utvrditi njegov pravni oblik i vrijeme osnivanja;
- 2) odluka osnivača o osnivanju podružnice;
- 3) prijepis izjave o osnivanju i društvenog ugovora ili statuta osnivača, ovjerenih po propisima zemlje u kojoj osnivač ima registrirano sjedište;
- 4) odluka o imenovanju lica ovlaštenog za zastupanje, ako to lice nije imenovano aktom o osnivanju;
- 5) ovjeren potpis lica ovlaštenog za zastupanje i
- 6) ovjeren skraćeni posljednji godišnji finansijski izvještaj osnivača.“.

#### Član 14.

U članu 34. st. 1,2,3,4 i 5, članu 35. stav 1, članu 36.st.1.i 2, članu 38. st. 2. i 3, članu 39. st. 1.2.3.5. i 6, članu 40. stav 1, članu 41. st. 1. i 2,članu 42. i članu 43. riječi: "notarski obrađena" brišu se.

#### Član 15.

U članu 36. stav 1. iza riječi: „kapitala i “dodaju se riječi: „notarski obrađene“.

#### Član 16.

U članu 38. stav 3, članu 39. st. 4. i 6, članu 40. stav 1. i članu 41.stav 1. riječi: "notarski obrađen" brišu se.

#### Član 17.

U članu 39. iza stava 6. dodaje se novi stav 7. koji glasi:

„(7) Ukoliko se promjene iz ovog člana vrše izmjenama osnivačkog akta, uz prijavu za upis promjena u registar, prilaže se notarski obrađena izmjena i/ili dopuna osnivačkog akta.“.

#### Član 18.

Član 51. briše se.

#### Član 19.

Član 74. mijenja se i glasi:

„Dostavljanje poreznog identifikacijskog broja

(1) Prijavu za upis osnivanja subjekta upisa i upis dijela subjekta upisa sud će odmah dostaviti nadležnom poreznom organu prema sjedištu subjekta upisa za dobijanje poreznog identifikacijskog broja.

(2) Sud će bez odlaganja, uz prijavu iz stava 1. pozvati nadležni porezni organ, da u roku od 24 sata od prijema prijave, dostavi porezni identifikacijski broj, ili da u istom roku obavijesti sud o razlozima nedostavljanja poreznog identifikacijskog broja.

(3) U slučaju dostavljanja poreznog identifikacijskog broja od strane poreskog organa, sud neće zahtijevati prilaganje bilo kakvih drugih dokaza o postojanju i/ili izmirenju poreznog duga.

(4) Dodjela poreznog identifikacijskog broja ne oslobađa poreznog subjekta obaveze porezne registracije poslovnog subjekta kod nadležnog poreznog organa, odnosno dostave poreznom organu podataka propisanih posebnim zakonom.

(5) Ako nadležni porezni organ ne dostavi porezni identifikacijski broj i podbroj u ostavljenom roku, sud neće donijeti rješenje o registraciji poslovnog subjekta.



(6) Sud će izdati rješenje o registraciji poslovnog subjekta odmah po dostavljanju poreznog broja, bez dodatnih troškova po poslovnog subjekta. U slučaju da se porezni identifikacijski broj ne dostavi u roku od 12 mjeseci od dana podnošenja prijave sudu, sud će odbaciti prijavu.“.

#### Član 20.

U članu 84. iza stava 1. dodaje se novi stav 2. koji glasi:

„(2) Federalno ministarstvo pravde će, u roku od 30 dana od dana stupanja na snagu ovog Zakona, donijeti propis kojim će utvrditi način raspolaganja podacima iz glavne knjige registra, postupak načina obezbjeđenja tehničke ispravnosti, održavanja, trenutne isporuke elektronskih podataka glavne knjige registra, kao i funkcioniranja sistema registracije.“.

Dosadašnji stav 2. postaje stav 3.

#### Član 21.

Ovaj Zakon stupa na snagu osmog dana od dana objavljivanja u „Službenim novinama Federacije BiH“.

# **OBRAZLOŽENJE ZAKONA O IZMJENAMA I DOPUNAMA ZAKONA O REGISTRACIJI POSLOVNIH SUBJEKATA U FEDERACIJI BOSNE I HERCEGOVINE**

## **I – USTAVNI OSNOV**

Ustavni osnov za donošenje ovog zakona sadržan je u odredbi člana IV. C. 3. a u vezi sa članom IV. A. 20. (1) d), Ustava Federacije Bosne i Hercegovine, kojim je propisano da pravila postupka potrebna da bi se osigurala jednakost u postupanju kao i osnovni principi pravičnosti u postupcima pred sudovima i organizaciji svih sudova bit će utvrđeni zakonima Federacije BiH. Obzirom da se ovim zakonom uređuju pravila postupka registracije poslovnih subjekata pred sudovima u Federaciji BiH navedena ustavna odredba predstavlja ustavni osnov za njegovo donošenje, pa je na osnovu člana IV. A. 20. (1) d) Ustava Federacije BiH, Parlament Federacije BiH nadležan za donošenje ovog zakona.

## **II – RAZLOZI ZA DONOŠENJE ZAKONA**

Vlada Federacije BiH je svojim Programom rada za period 2012. – 2014. kao strateški prioritet identificirala intenziviranje privrednog razvoja, te utvrdila da će naglasak u ovom periodu biti na jačanju domaćeg tržišta i uklanjanju barijera. Između ostalog, neophodno je poduzeti snažne mjere na smanjenju administrativnih barijera i opterećenja privrednim subjektima, prije svega u oblasti registracije poslovnih subjekata. U skladu sa postavljenim ciljevima u oblasti poslovanja i funkcionisanja privrednih društava neophodno je usvojiti i nove europske standarde korporativnog upravljanja. Istovremeno moraju se ustanoviti efikasni mehanizmi za praćenje primjene tih standarda.

U cilju unapređenja ekonomskog prostora Federacije BiH neophodno je sprovesti brojne aktivnosti na usklađivanju poslovnog okruženja jer isto karakteriziraju brojna regulatorna ograničenja, zastarjeli, nejasni i neprimjenjivi propisi, te sporost u postupanju nadležnih organa. Ovim se značajno usporava proces ukupnog ekonomskog razvoja, a između ostalog i nameću značajni ekonomski troškovi privrednim subjektima.

Zakon o registraciji poslovnih subjekata u Federaciji BiH („Službene novine Federacije BiH“, br. 27/05, 68/05 i 43/09) je procesni zakon koji reguliše dio oblasti čija je implementacija direktno povezana za ostvarenjem postavljenih ciljeva Vlade Federacije BiH. Zakon je do danas pretrpio dvije izmjene i dopune, a njegovom primjenom, utvrđeno je da je postupak registracije društva u Federaciji BiH komplikovan, skup i dugotrajan, te da kao takav predstavlja prepreku potencijalnim investitorima u pokretanju poslovanja u Federaciji BiH. Pored toga, pojedine odredbe važećeg zakonskog teksta su u dijelu neophodne dokumentacije, redoslijeda koraka,

trajanja procesa i oblika zahtijevane dokumentacije u koliziji s ostalim važećim propisima u Federaciji BiH (Zakon o privrednim društvima, Zakon o notarima, porezni propisi), te s tim u vezi kreira dodatnu pravnu nesigurnost. Sve ovo negativno utječe i na ranigranje BiH, odnosno Federacije BiH u brojnim istraživanjima koja se bave pokretanjem poslovanja, pa primjerice prema izvještaju Svjetske banke „Doing Business“, BiH je u posljednje dvije godina na 162. mjestu od 183 analizirane ekonomije s fokusom na postupak registracije, odnosno pokretanja poslovanja.

Domaće vlasti su, u skladu se članovima 70. i 87. Sporazuma o stabilizaciji i pridruživanju sa EU, dužne uspostaviti saradnju u pogledu postepenog usklađivanja postojećih zakona i budućeg zakonodavstva s pravnom tečevinom EU, ali i ojačati provođenje ekonomske reforme, s ciljem jačanja privrede, poslovnog okruženja i ekonomskih politika. Cilj je, između ostalog, omogućiti slobodno i jednostavno uspostavljanje i registraciju privrednih društava, jačanje efikasnosti i konkurentnosti društava, jačanje kapaciteta za prekograničnu saradnju, te modernizacija zakona, principa registracije, poslovanja, korporativnog upravljanja.

Imajući u vidu zacrtane ciljeve Vlade Federacije BiH, te značaj postupka registracije u razvoju ekonomije i postizanju napretka i ispunjavanju zahtjeva vezanih za proces približavanja Evropskoj Uniji, revizija i izmjene postojećeg Zakona o registraciji poslovnih subjekata su identificirane kao jedan od preduvjeta obuhvaćenih stand by aranžmanom sa Međunarodnim montarnim fondom (MMF). Također, ovaj Zakon predstavlja i jedan od elemenata matrice za pregovore oko novog zajma Svjetske banke vezanog za budžetsku podršku unapređenju razvojnih politika u BiH. Akcenat se u oba slučaja stavlja, između ostalog na poslovno okruženje pri čemu je cilj privlačenje što većeg broja investicija, kako domaćih, tako i stranih, a kojima će se podržati srednjoročni ekonomski rast. Vlada Federacije BiH je opredjeljena da nastavi ulagati napore s ciljem pojednostavljenja postupaka i jačanja transparentnosti u ovoj oblasti.

### III – OBRAZLOŽENJE NAJZNAČAJNIJIH PREDLOŽENIH PRAVNIH RJEŠENJA

Razlozi za donošenje ovog zakona sadržani su u potrebi stvaranja pretpostavki za unapređenje poslovnog okruženja kojim bi se omogućilo lakše osnivanje i poslovanje privrednih društava, jasnije definisala neophodna dokumentacija, te koraci u procesu registracije.

### IV – OBRAZLOŽENJE PREDLOŽENIH PRAVNIH RJEŠENJA

*Članom 1.* Nacrta Zakona o izmjenama i dopunama zakona o registraciji poslovnih subjekata u Federaciji BiH- u daljem tekstu Nacrta, izvršeno je terminološko usklađivanje sa Zakonom o privrednim društvima Federaciji BiH-u daljem tekstu Zakona. Zakon poznaje samo naziv „podružnica“ koju definiše kao

poslovnu jedinicu koja nema svojstvo pravnog lica. Stoga je u članu 15. Nacrta brisan termin „poslovna jedinica.“

*Članom 2.* izvršeno je usklađivanje sa članom 10. Zakona, koji kao novinu uvodi mogućnost osnivanja podružnice stranog društva. Predloženim dopunama definisani su podaci koji se upisuju u registar u slučaju registracije podružnice stranog društva, te je određena nadležnost registarskog suda za postupanje u slučaju osnivanja podružnice stranog društva.

*Članom 3.* Vršiti se intervencija na članu 17. stav 1. tačka 3), članu 18. stav 1. tačka 3), članu 19. stav 1. tačka 3) i članu 20. tačka 1), na način da se napušta koncept notarske obrade pojedinih odluka privrednih društava u toku postupka registracije i vrši se usklađivanje sa Zakonom o notarima („Službene novine Federacije BiH“ broj: 45/02). Zakon o notarima izričito predviđa notarsku obradu za osnivačka akta privrednih društava i utvrđivanje njihovih statuta, kao i svaku promjenu statuta. Iako obaveze notarske obrade isprava mogu biti predviđene i u drugim zakonima, to ni u kom slučaju ne može biti učinjeno procesnim zakonom kao što je ovaj Zakon.

*Članom 4.* skraćen je spisak dokumentacije koja se podnosi registarskom sudu za potrebe utvrđivanja općih i posebnih podataka koji se prilikom osnivanja poslovnog subjekta, ili izmjena podataka od značaja za pravni promet obavezno unose u registar;

- obaveza podnošenja lične karte, putne isprave ili izvotka iz odgovarajućeg registra kojim se utvrđuje identitet osnivača za stranu ili domaće fizičko ili pravno lice je suvišna, obzirom da je tačkom 4. istog stava predviđeno da će sud zahtijevati podnošenje notarski obrađenog akta o osnivanju ili akta o izmjenama općih podataka od značaja za pravni promet već osnovanog, odnosno registriranog subjekta upisa kojim se utvrđuje osnivanje, odnosno izmjena bitnih podataka, s ovjerenim potpisima ovlaštenih lica. Budući da notar, prilikom notarske obrade akta o osnivanju utvrđuje identitet osnivača, na osnovu istih dokumenata, suvišno je da se te isprave podnose sudu;

- obaveza podnošenja identifikacionih isprava za podnosioca prijave predstavlja suvišan korak u postupku upisa u sudski registar poslovnih subjekata, te je s toga i ova odredba brisana. Podaci o podnosiocu prijave se ne unose u sudski registar, pa nema nikakvog opravdanja ni potrebe da se zahtijeva od podnosioca prijave podnošenje identifikacionih dokumenata, a prijavu za registraciju moguće je podnijeti i putem pošte ili elektronski;

- obaveza prilaganja lične karte ili putne isprave i odgovarajućeg pisanog ovlaštenja, kojim se utvrđuje svojstvo lica ovlaštenog za zastupanje, odnosno predstavljanje,

subjekta upisa je suvišna budući da se prilaže ovjereni potpis tog lica, a prilikom ovjere potpisa nadležan organ utvrđuje identitet na osnovu navedenih isprava;

- notarska obrada akta o osnivanju ili akta o izmjenama općih podataka od značenja za pravni promet već osnovanog, odnosno registriranog subjekta upisa kojim se utvrđuje osnivanje, odnosno izmjena bitnih podataka isključuje potrebu ovjere potpisa, pa je ta obaveza brisana;

- član 22. stav 3. brisan je u potpunosti, obzirom da je suvišan nakon izmjene odredbe iz stava 1. tačka 3. ovog člana. Naime, predmetnom izmjenama predviđeno je da registarski sud zahtijeva podnošenje ovjerenog potpisa lica ovlaštenog za zastupanje na obrascu prijave za registraciju predviđenom za sud u štampanom oblik, pa je odredba iz stava 3. suvišna.

Čl. 5.6.7. i 8. izvršeno je usklađivanje dokumentacije koja se prilaže uz prijavu za upis osnivanja dioničkog društva, banke ili druge finansijske organizacije, dioničkog društva za osiguranje, i društva sa ograničenom odgovornošću, sa predloženim izmjenama člana 22. Zakona, na koje se ove odredbe pozivaju. Također je izvršeno i usklađivanje sa Zakonom o notarima, tako da se zahtijeva notarski „utvrđen“ statut, što je tačnija formulacija uzevši u obzir odredbu člana 73. stav 1. tačka 5. Zakona o notarima, koji poznaje jedino termin „utvrđivanje statuta“ privrednih društava. Također je brisana obaveza notarskog potvrđivanja odluke o imenovanju lica ovlašćenog za zastupanje/akta o imenovanju direktora.

Članom 9., vrši se izmjena člana 28. osnovnog zakonskog teksta radi usklađivanja sa predloženim izmjenama člana 22. stav 1. tačka 1) te je izvršeno usklađivanje sa Zakonom o notarima, odnosno brisanje obaveze notarske obrade odluke o promjeni oblika preduzeća, te ugovora o pribavljanju dodatnog kapitala, kao akata za koje Zakon o notarima nije predvidio obavezu notarske obrade.

Članom 10. vrši se izmjena člana 29. stav 1. važećeg Zakona, te je izvršeno usklađivanje sa predloženim izmjenama iz člana 3.

Članom 11. vrši se izmjena člana 30. važećeg Zakona, te se zakonski tekst usklađuje sa Zakonom o notarima, odnosno napušten je koncept obaveze notarske obrade odluke o imenovanju zastupnika poslovnog udruženja.

Članom 12. izmjenjen je član 31. stav 1. važećeg zakonskog teksta i izvršeno je usklađivanje odredbe kojom su propisane isprave potrebne za upis u registar osnivanja zadruga i zadružnog saveza sa Zakonom o notarima. Naime, Zakon o notarima ne poznaje potvrđivanje akta o osnivanju zadruga (već jedino obradu akta o osnivanju), zadružnih pravila ili odluke o imenovanju direktora.

*Članom 13.* vrši se intervencija na zakonskom tekstu na način da se iza člana 32. dodaje novi član 32a. kojim se propisuju isprave potrebne za upis u sudski registar, ukoliko se radi o osnivanju podružnice stranog društva.

*Članom 14.* vrši se odgovarajuća intervencija na čl. 34. 35. 36. 38. st.2. i 3. članu 39.st.1.2.3.5. i 6., članu 40. stav 1., članu 41. st.1. i 2, članu 42. i članu 43. važećeg Zakona kojim se na odgovarajući način vrši usklađivanje odredaba ovog zakona iz razloga navedenih u obrazloženju člana 3. Nacrta.

*Članom 15.* vrši se intervencija na članu 36. stav 1. važećeg Zakona i osigurava seusklađenost sa Zakonom o notarima.

*Članom 16.* vrši se intervencija na članu 38. stav 3. članu 39. st. 4. i 6., članu 40. stav 1. i članu 41. stav 1. iz razloga navedenih u obrazloženju člana 3. Nacrta.

*Članom 17.* vrši se intervencija na članu 39. važećeg Zakona. Predloženom odredbom izvršeno je usklađivanje sa Zakonom o notarima koji tretira isprave potrebne za upis u registar promjene firme, promjene sjedišta, promjene djelatnosti, promjene odgovornosti, promjene lica ovlaštenog za zastupanje, promjene osnivača ili povećanja odnosno smanjenja broja osnivača ili promjene osnivačkog udjela subjekta upisa, na način da se napušta obaveza notarske obrade odluka o gore navedenim promjenama.

*Članom 18.* brisan je član 51. važećeg Zakona „Identitet podnosioca prijave“obzirom da je ovim izmjenama i dopunama brisana obaveza podnošenja identifikacionog dokumenta kojim se utvrđuje identitet podnosioca prijave, kao suvišan. U skladu sa tom izmjenom, i ova odredba je brisana kao suvišna, jer je dovoljno da registarski sud u slučaju da se prijava predaje neposredno, provjeri identitet podnosioca na licu mjesta, što je predviđeno članom 50. stav 1. važećeg Zakona.

*Članom 19.* vrši se intervencija na članu 74. važećeg zakona na način da je izvršena korekcija postupka dostavljanja poreznog identifikacijskog broja, u cilju ubrzavanja i olakšavanja procedure registracije osnivanja subjekta upisa.

- raniji naziv: „Postupak nadležnog poreznog organa“ zamjenjen naslovom: „Dostavljanje poreznog identifikacijskog broja“ obzirom da je raniji naziv člana bio neprihvatljiv, uzevši u obzir predmet Zakona, definisan članom 1. ovog Zakona

- st. 2. i 3. su izmijenjeni, kako bi se izbjeglo zahtijevanje prilaganja bilo kakvih drugih dokaza o postojanju i/ili izmirenju poreznog duga, ukoliko nadležni porezni organ izda porezni identifikacijski broj. Izmjene su izvršene i kako bi se uskladio postupak izdavanja poreznog identifikacijskog broja sa postupanjem registarskog suda propisanim u članovima 53. i 54. ovog Zakona.

- st. 4., 8. i 9. su brisani, jer je njima regulisana materija koja ne može biti regulisana ovim procesnim Zakonom, imajući u vidu predmet Zakona, koji određuje da se njime uređuju pravila vanparničnog postupka na osnovu kojih nadležni registarski sud postupa i odlučuje o upisu u sudski registar poslovnih subjekata u Federaciji BiH.

*Članom 20.* izvršena je dopuna člana 84. Zakona i propisana je obaveza Federalnom ministarstvu pravde za donošenje provedbenog propisa, kojim će se precizirati način raspolaganja podacima iz glavne knjige registra, postupak načina obezbjeđenja tehničke ispravnosti, održavanja, trenutne isporuke elektronskih podataka glavne knjige registra, kao i funkcioniranja sistema registracije. Naime, u stavu 1. važećeg zakonskog teksta navedena obaveza je utvrđena, ali nije propisan njačin njene realizacije što u praksi proizvodi dileme, koje će se otkloniti donošenjem provedbenog akta.

#### IV – FINANSIJSKA SREDSTVA

Za provođenje ovog zakona nije potrebno obezbijediti dodatna sredstva u Budžetu Federacije Bosne i Hercegovine.